

陝西按察使何公自學墓表

薛瑄

何公諱自學字思學其先閩人遠祖諱瓊者仕五季之周爲尚書僕射瓊子輝爲屯田郎中始家金谿今爲金谿人公曾大父諱伯啓大父諱宗哲父秉煥號綠水翁比三世皆修己行義晦迹弗耀綠水翁娶曾氏有婦德生二子長卽公也公資性夙敏舉止異凡兒綠水翁知其必有立入歲卽遣從鄉先生游讀書數遍輒不忘江西按察司僉事行部至金谿選鄉學子弟可充增廣員者得公大喜卽拔登邑庠時年十五矣公遂從孟司訓授書經益肆力於學比弱冠已

自習熟諸書世所謂舉業者綽有餘力間爲古文詩
章尤渾厚清新有作者步驟公試鄉舉一往卽中前
列登宣德丁未進士第初任刑部河南司主事公以
賁之象曰明庶政無敢折獄故折獄於庶政爲大於
是早夜以中正明達自勵盡心獄事時稱明允如辯
冤獄白能等事蹟俱入史館編錄值 朝廷選刑官
之能者分理天下滯獄公首被推擇得閩浙公旣奉
勅以往雖山郡海邑惡瘴狂飈有所不憚必親至其
地爲疏理其繫囚二藩旣大以遠人得昭雪而蒙其
惠者甚衆公竣事還未至而已馳聲京師適歷官三

載例得推恩綠水翁封如公職曾氏封安人公復上
章乞歸省詔許之且賜以楮幣公并以所得恩賜白
金之類悉歸奉二親一毫不入私室一時之榮慶孝
義動於里閭正統三年公爲廷臣推舉陞廣西按察
僉事其地乃嶺表百越溪峒猺獞不時竊發剽攻甚
則彌之以兵雖得少靖而民已病於餉運公於所分
巡地必大示威信猺獞雖蠻然亦知畏服因得減征
行之擾其編民亦雜夷獠不通道理每構訟輒爲講
張詞不可究詰動引百十人連歲不已公嘗偕奉勅
卽審錄所部繫囚其勤慎如在閩浙時夷獠積年久

滯之獄咸得伸理既而丁綠水翁憂營葬一如古禮復廬居墓次者三年釋服調除山西按察僉事其憲體益謹而尤能興學以教人表廉以厲貪時大同方宿重兵以防控荒外利害繫於守將公常巡部至其府作書勸其守將當協和共事者以濟邊功後來事多如公所料人服其先識未幾復丁曾安人憂歸家山西巡撫及三司連章以謂山西邊事方殷古有金革變禮之制宜奪情何某以任事詔從所請公復官未逾月詔陞陝西按察使公既屢更法司事任益詳閑於大體洞達其細微及長外臬司凡端澄聽折表

拔刮剔之政以次行之令修於庭戶風行於方岳事方就績竟以暴疾卒時景泰三年正月享年五十有六余猶記往年公過余河汾出二書其一卽勸邊將協和共事者其一與冢宰論進退賢否之法甚備公又語余曾爲執政者言當起退休老成者某等用之於乎使此三者得行於時其有補於世亦豈小哉

陝西按察使來公天球墓誌銘 餘姚邵

公諱天球字伯韶號兩山始祖廷紹宦卒蕭山遂家
焉祖儀隱德弗仕父主事西庄公雍慷慨有大志公
十三歲而孤臨終掌寫讀書二字母忽我言汝必橫
金以高我門公矢不忘事嫡母王氏生母孔氏十九
歲充弟子員丙午以尚書膺薦越庚戌登錢福榜進
士試政司空明年委督姑蘇司空孔公墓弘治九年
除工部都水司主事蒞呂梁放舟俱有日期權勢莫
撓以分司隘于民居弗稱王臣分蒞之所區處面鏡
黃河背峙梁山以書餼糧事期壯哉漕河通濟之保

障矣又鑿義井立社學脩河塘植榆柳政暇尋禹鑿河及蘇東坡沉石洪詠秩滿赴部考最績詔推封公父西庄公爲主事母爲安人十二年調刑部廣東司十三年陞本部江西司員外郎益精法律差徃獨石關等處勘問失機人犯叅奏叅將劉軌以下皆斬罪十四年陞山西僉事叅奏晉府徐庶子多不遵法罪其尤二三人甲子監晉試得士係紹先銀鏡等皆內翰澤州奉國將軍截耳訴寃與巡按謝公朝宣叅議自傷支體奉 旨發高墻禁錮終身以例其餘時武宗登極瑾賊擅權懷不與東揖之恨適儀賓人司

副使謝孚傳

謝孚字以誠號易軒其先自京陵卜居姑孰遂占籍當塗焉祖德明在元時由諸生受辟從事本路至江浙行省掾除江南行御史臺照磨丁時多艱厄卽棄告身歸隱父興甫亦以隱德聞孚自少穎悟拔出讀書強記治易有玩索功故以名軒永樂三年領鄉薦明年登進士第賜勅諭歸鄉以成德業五年徵回除陝西道監察御史潮州百家畚恃險奔突搔擾屬邑太宗文皇帝命孚與都指揮趙德勦捕孚乘傳至潮先行招諭復徵近地官軍勦捕一方用寧時有事

北方糧餉旁午行在都察院復以孚督運口北事完
扈從回還 陛見陞福建按察司副使丁內艱起復
調陝西按察司副使所在有明允聲中貴蒙附石有
事於邊道經咸陽三司設宴接款時孚掌司事獨不
跪蒙怒甚孚言 朝廷重方岳欲其表式下僚也不
得行其志則已豈可自屈於人乎竟不成席而罷正
統三年九載考績力求致仕歸卒于家年六十三以
子騫貴贈中議大夫贊治尹

以公擅加刑責瑾乘機差三法司會勘一無所擬瑀
不平再奏更下大同巡撫崔公巖御馬監太監朱秀
復勘如前劄公著調別省韓瑀革去冠帶祿米三年
方得暴白同年方公良永以書慰公曰秉性方剛動
與物忤執法太嚴多遭全毀時以爲名言巡撫魏公
坤何公鈞謝公朝宣弓公元累保公以廊廟之材水
蘖之操堪以大用正德五年以韓瑀事調陝僉屯田
六年議陞大理寺少卿不報總制才公寬巡撫黃公
寶以關中重地時事多乖須得公保釐又報四川流
賊入漢中府界公卽起撫勦不以官別省而尚任陝

事爲戒會保留陝藩符劄亦到尋陞陝西按臺兩峯
洪公鍾行委監軍紀功統總兵官闡綱及邊兵土兵
共一萬六千員名入川皆出公便宜區處公至竟夕
不能安寢追圍七月計擒賊首藍五等以凱獻上
喜璽書賜獎當夜東哨欠嚴逃突寥麻子一支勢復
慘烈越旬月百計誅勦總制洪公四省巡撫會保公
久勞戎事未霑一級之賞奉 旨陞本司使仍在軍
前殺賊賊平回司視篆一洗秦牘訪拏貪酷時癸酉
監試得士吳縉許宗魯王朝用輩皆爲名臣適河南
鎮守廖堂調陝公發其索每縣地畝銀并日索西安

陝西按察司副使莊公觀行狀

張楷

明理屬詞謂之學成已成物之謂道篤行孝弟謂之
行三者一理而已能盡此者吾於友兄莊公見之公
諱觀字居正歙之莊村人年十四執父喪有禮弱冠
游郡庠才識穎敏讀書過目成誦同輩皆推讓之永
樂辛卯以春秋應鄉貢明年會試中乙榜分教浙之
義烏公素明理善屬詞造就弟子有法歷三科得秀
士八人皆爲世用滿考優等陞辰溪教諭一以教義
烏者教其弟子文風翕然未幾丁內艱起復赴京擢
國子學正弟子居座下者皆知明理屬詞出而從宦

悉能推公所教以措諸用正統改元新制每省以憲
臣董儒學治大臣各舉所知大司馬王公驥以公薦
擢陝右按察僉事董八郡秀士以督其成公首立教
條次嚴紀律務期成德達才之効陝西疆里散闊山
川險阻公不憚勞苦歲一躬蒞必得其實以故八郡
士子爭先奮勵以學成名立爲期若咸寧楊鼎之占
會元與蘭縣黃諫鳳翔劉俊相繼及第入翰林有名
其他第進士者屢科不缺咸著英譽若都御史王竑
任寧之類予嘗與公同出行部曰學校以明倫爲先
文章末事耳郡縣遵其化雖夷狄之俗皆尚廉恥公
德所致也諸生有聰慧出衆進益學業者則喜形于
色愛養如至寶語予曰西人得此實翹萃者也吾獎
之以礪諸子俾各觀感以盡力其造就人才類如此
九載秩滿例得陞秩今少保吏部尚書東閣大學士
王公時以都憲出鎮關中恐公之去而士子失望特
爲之具奏陞擢本司副使仍董學校又三載是爲景
泰改元奉表赴京遂上書乞骸骨旣得請則挈其男
女還鄉公自筮仕卽迎其母宜人赴義烏恪盡孝道
又陞辰溪母歿哀毀踰禮復以其餘葬無力者十餘
喪今引年歸老益篤孝義念兄璿同祖同弟興同相

淪歿諸孤幼穉公斤餘俸分給之教育無異已子
餘則濟里中貧乏及修橋梁道路以利衆人而於
冢廟之制則拳拳焉務勝他族歲時祭祀必備禮物
極誠敬亦爲他族所稱公之曾大父天錫祖廷璧皆
隱德弗耀父永寧以公貴贈奉政大夫陝西按察司
僉事母張氏

陝西按察副使劉公安傳

李濂

劉公安字元靜世爲大梁人曾大父貞博學工文辭
元至順辛未以茂才薦授國子監學錄大父士謙讀
書好客嘗於所居東偏構軒扁曰延賓每客至必設
酒留欸劇談今古疊疊忘倦父榮公直孚于鄉曲以
公貴贈文林郎山東道監察御史母陳氏封太孺人
公體貌敦厚少厲志節入開封郡學爲弟子員治周
易夜必衣冠危坐誦讀達旦久之大有所得朋輩咸
退遜以爲不可及登永樂癸卯鄉舉宣德庚戌春會
試南省中乙榜授山東金鄉縣學訓導克勤誨士部

使者薦之擢山東道御史公慨然以功業自期明憲
綱究律令劾姦洗寃振揚風紀事有難處者都臺必
屬公無弗竟者嘗奉命巡按南北京畿風裁峻整公
在道九載景泰庚午春以大臣薦擢山東按察司副
使用法平恕恒存欽恤之意至遇渠惡巨猾爲民厲
者則不少假貸由是吏畏其惠聲稱籍甚逾三載丁
內艱還汴天順戊寅秋服闋復除陝西按察司副使
應詔陳時務三策一曰從祀謂我朝開國以來養士
百年豈無真儒可續道統之傳請勅禮官推訪著書
立言扶翊聖道者列諸從祀以風厲來學二曰軍務
謂邊方軍士衝冒風雪不勝寒苦合議罪犯收贖
例米粟革襖兼納頒給軍士爲禦饑凍之需三曰水
利謂濟寧上下凡有泉源去處宜疏通入河以濟舟
楫英廟可其奏次第行之甲申公年踰六十懇乞骸
骨歸與汴中二三耆舊詩酒倡酬以樂太平壽九十
餘歲論曰余聞汴故老言憲副公歸田時囊無餘貲
惟舊屋一區弗蔽風雨敝衣糲食出不能具驢車然
其壽獨高又曰憲副公清修好古晚歲嘗采輯古今
詩文之粹者若干篇分爲六卷題之曰資蒙寘諸家
塾以垂訓子孫今家世衰微而其遺事鄉邦無知之

者余蒐訪百至久弗能得茲姑據所聞書之無亦使其湮滅亡傳焉爾

陝西按察司副使白君侃墓表

葉盛

天順二年廣東珠池之役合六郡兵民之衆而中貴十五人者儻從官校寔多且將事銳甚時巡按監察御史白君言之中貴人以爲珠固不敢稽也今西賊久流如民疲何中貴人感動官校怙勢虐下卽能廉得其實責之中貴人自治由是且慚且懼爲之斂跡中貴人有欲屬叅吏者君不從曰叅吏有簿巡撫旣出巡按承之巡按乃可爲巡撫欺耶未幾予來自廣西聞有愛御史者嘗以太剛媒禍爲言君聞卽正色曰侃未學初仕患在不能剛耳言者愧之嗚呼予治

廣者六七年直道守正不屈不隨如白御史者可多得哉然君之可稱殆不止是其巡按南畿時以六事爲言一正心身曰古者帝王誠意正心以修其身是以天下和平享國長久後世之君天性之高稍知道者亦能小康僅至中壽其他率多驕縱自恣凡蕩心喪志損身敗德之事靡不爲之是以喪亂相仍身多夭折也 陛下屬春秋鼎盛血氣嚮隆當以古帝王爲法後世人主爲戒其二勤務學人主不可以不學而學不可以不勤宜亟選碩德重望明識政體老成儒臣處之便殿從容論講裨益聰明脫此時不學後

雖欲學焉殆恐不如今日之易進且專也貞觀正業陸贄奏議大學衍義三書甚切治道尤乞留意三曰賞罰至公所以法天道後世如漢祖唐宗亦皆史冊有書可爲後法邇者近習交結事露亟寘之法天下聞之無不悅服所望於將來者愈堅此心一賞一罰悉出乎公則治道可成四曰初政二詔利興而害革軍民頌歌無間遠邇且聞大內珍禽草木悉已放除外方貢物多已不納非徒言而不能行矣繼自今惟在乎守初心行初政而已五精選練夫國之安危在將戰之勇怯在兵祖宗承平甚重乎此如曰將非精

求士非素練難矣宜令集議京師各邊正副總戎謀
贊文臣分營都指揮等各精選得之具立條式俾彼
此相制上下相維一意操備而又嚴其侵漁役占之
禁庶得實用六曰石曹二逆禍將萌也臺官亦嘗有
言而反爲排擠如御史耿九疇御史張鵬楊璉之謫
降是已 先皇聖明九疇尋卽召用其均霑未及之
人宜加收用以伸公道以慰人心 上覽奏深用嘉
納悉付施行旣而代還掌道事牛玉得罪南京給事
中王徽等跡其悞事之因并及李賢忤旨調外君率
其同官上言徽等初心一忠愛所激而遽加斥逐之

天下之人將以爲不樂人言顧忌畏禍弊將不勝況
今日拭目維新之治而乃首斥言事之臣於太平盛
治不能無損雖未得報時論莫不韙之君諱侃字廷
直姓白氏太原平定人曾大父德興大父勲洪武中
舉孝廉官至楚府審理正父琦有年德爲鄉耆老以
君貴封監察御史母石氏君景泰甲戌進士浙江道
御史應天等府及廣東兩巡按外又嘗巡視太倉督
捕中城賊盜巡理紫荆等邊關有勅書寶楮之賜超
陞陝西按察司副使以軍務邊儲往來延慶者再暮
竟卒於榆林邊人哭之如喪所生其爲人孝友忠信

家有寡嫂官下歲必寄衣家素饒每寄書誠其子弟
凡鄉人舉貸不必計利有無在太學號合偶得遺金
十兩詢其主而還之居官恒自誦曰公以處事私意
一毫無地入廉以持身誠心兩字有天知書粘私室
之壁去則揭之其自勵如此故所至有不菜聲

陝西按察司副使劉公瀚墓志銘 李東陽

公諱瀚約之其字別號樗菴先世本汴人宋南渡有
爲黃州統領者徙建康後有諱順者權茶平江路遂
居長洲高祖諱元善元季集義兵保障其鄉曾祖諱
德讓國初爲沛縣儒學教諭祖諱仲輿贈中書舍人
考諱鉉累官翰林學士國子祭酒詹事府少詹事贈
禮部左侍郎以學行聞於時文恭其賜謚也公少爲
蘇州府學生景泰庚午領南畿鄉貢卒國子業有名
其舉進士在順天丁丑試政禮部領詔至揚州府府
餽金二錠公峻拒弗納列郡皆相戒勿餽縉紳繪却

金圖賦詩以頌之其爲大理在天順成化間讞駁詳
慎嘗奉勅錄京畿及江西重獄平反四百餘人出賑
河間諸府饑民籍名給粟者十五萬其爲同知八年
專理戎籍多所釐正鄰郡懇訟者踵相沓爲知府得
爲副使益持憲體會邊徼多事督餉不乏資望日積
而遽致事以去西安府餽金爲贖却之曰不聞致仕
與在任同邪時弘治己酉也居鄉十七年足不至公
室歲鄉飲有司禮爲大賓其于生服履孝義與人交
際無諛詞妄語精法比達政體善古文歌詩而終身
不自伐績未屬呼諸子孫至前連舉孝弟忠信四字
訓之猶懇懇不置壽八十有一矣

何景明傳

喬世寧

何先生者信陽人也名景明字仲默號大復山人

海內稱大復先生云生有異質穎記殊絕八歲

能賦詩爲文章諸老生見者爭傳誦稱爲神童年十

二以父仕臨洮府驛丞乃隨侍臨洮守李紀者聞其

奇召置門下甚愛幸賢之爲延師授春秋居頃之卽

善說春秋歸又受尚書長兄景韶所甫數月卽以尚

書魁河南省試當是時年財十五也諸王公大人爭

迎致一見候車常數十乘所過人觀者如堵旣入京

師遊太學祭酒林公又甚愛幸賢之歸則詩贈焉于

是名盛傳海內猶鳳鳴麟出世人驚覩也年十九登
壬戌進士授中書舍人是時北地李獻吉武功康德
涵鄔杜王敬夫歷下邊廷實皆好古文辭先生與論
文語合乃一意誦法古文而與獻吉又駿發齊名憂
憤時事尚節義而鄙榮利並有國士之風焉往學士
爲文自六朝以後日益靡靡敝矣國初尚襲元習宣
正以來駸駸如宋矣至弘正間先生與諸君子始一
變趨古其文類國策史記詩類漢魏盛唐于是明興
詩文足起千載之衰而何李最爲大家今學士家稱
曰何李或稱曰李何屹然爲一代山斗云在中書時

自館閣諸縉紳與四方學士人人願見先生又願
先生詩車馬填門巷不絕而先生德性醇明言儻雅
雅恬酒談笑間詩文立就作字復秀拔奇勁迥出常
格一時聲傾都下然顧高潔不妄交游錢寧欲交謹
先生間持古畫求先生題先生曰此名畫無汙吾題
留一年終不與題是時寧賜宗姓最寵貴弄權先生
顧奴視遠之會乾清官災應詔言便事乃極言邊軍
番僧義子數事義子者斥錢寧也疏留中不出師御
史客死京師權倖廖鵬者賻之棺謂可結縉紳謹也
先生曰御史生不苟受奚爲受汙地下邪乃約所知

共賻金斂之竟却其棺後督學關中會鵬弟鸞鎮守
關中恃勢益橫諸叅隨者遇二司不下馬先生執叅
隨者撻于市責數之乃諸叅隨者始人人斂避矣先
是逆瑾撓吏部權則移書許太宰引正大義獻吉與
姜御史詰奏又移書楊太宰直獻吉獄少師李西涯
疏上乞休會有兵事又援古大臣義爲書讓之三書
皆非身事而抗言尊顯語涉時忌議者謂憂國憐才
古人莫加也顧獨以不能干謁守中書十年不謁官
然志在經術世務終不言功名事其督教關中士亦
以經術世務如其所自志關中士習文藝蓋自是一

大變云是時世寧侍先生正學書院先生說五經
與諸家訓詁多殊私以爲諸訓詁不及也古天文地
理陰陽律曆家皆能究其指意常言彼有是有不是
欲取經訓與諸家書刪繁折衷成一家言顧三十九
而卒志業竟不及就也豈命數然邪抑詩文盡洩神
秘固造物所忌邪嗟乎嗟乎而志狀則言先生使滇
南不持滇南一物持父母喪不終禫則不酒不琴性
不喜華麗不治產祿入盡散親故臨卒時餘三十金
篋中此固世俗所難在先生猶其細者始先生崛起
汝南人卽以爲班固崔駰陸雲王勃之流也夫數子

皆幼慧英特才藻雄麗者故人以此先生至先生德
量風節數子又安可並論哉世多言修士少文才人
行劣二者蓋更相笑也乃先生則獨稱全才可不謂
振古豪傑士邪所著雍大記三十卷何子十二篇詩
歌千餘首書疏騷賦序記銘贊雜文數百篇盛傳當
世名可萬世不朽矣次子立舉癸卯鄉試立子洛文
復少俊皆能世其家學喬生曰世稱何先生詩至名
傳四夷不虛也其節行人不盡傳何哉及讀何子十
二篇又歎有王佐才而蚤死不遇悲夫余故述先生
行事采其關國體大者令太史氏有可攷焉

陝西提學副使王鳳靈傳

王鳳靈字應時耕原人其先曰王發者依舅氏姓吳
弘治中有御史吳玉榮卽鳳靈伯父也 毅皇帝十

一年鳳靈偕兄鳳儀舉于鄉俱從吳姓明年丁丑鳳
靈舉進士授刑部主事始疏復王姓云鳳靈生有異
質日誦書數萬言輒終身弗忘爲文章以氣勝其起
家比部郎年甫弱冠乃明習法理如老吏宦官張銳
都督錢安等罪當死詔減戍且許贖金諸法吏咸愕
然鳳靈獨疏論之其略曰此等非逆瑾瓜牙則錢寧
羽翼非交通宸濠則結好江彬蓋必誅之賊也今以

賄囑轉移 聖慮臣恐奸雄伺釁皆將謂私交可無
誅亂政可不殺而獄可賄鬻肆無忌憚天下之毒可
勝言哉疏奏竟如法司議給事中陳洸者罪有顯狀
世廟以議禮故庇之鳳靈疏言曰議禮者自議禮
犯罪者自犯罪何得援此以掩彼也臣聞 先朝開
國靖難及諸迎立元勳豈無寵利動觸刑章卽如議
禮諸臣深係 聖心而或處極盈之會犯不韙之科
陛下亦將與衆棄之而不得私如洸之罪又奚待
持不決之疑諸曹咸爲之悚然謂公言直如議禮諸

一可鳳靈毅弗顧自是無敢復庇洸者矣其練達

守法類如此年未三十出爲襄陽太守未幾以母喪
歸服闋補淮安淮稱劇郡鳳靈至視無難者問民所
疾苦清徭賦擊豪猾數十輩更創郡縣學又闢龍溪
書院廣徵屬邑士與肄校其文藝爲之筆削刻曰同
文錄又引淮水入泮以開科第之祥故其門人一時
登科第顯庸者甚多淮故患水鳳靈首疏五事以疏
泄重農爲先又因頻歲旱蝗連上秋災夏蝗等四疏
請蠲秋糧雜賦出餘鹽銀數千以賑民復疏停馬價
懇惻數千言俱得請民賴以甦嘗鑿淤河辨疑獄緝
治巨盜卽古稱廉明何加焉在淮五年擢陝西學憲

淮人卽龍溪書院爲生祠祀之未抵陝遭謗歸起補
霸州兵備佐翟相行九邊又督城沙河議省費忤柄
事者故疏留五載始遷廣右大叅未赴忌者以考察
竟罷之鳳靈性伉直好激論天下事以此多忤人功
用惜未究也其文章名高于時所著有淮陽急稿及
諸奏疏字法王右軍人珍慕之今淮諸生稱曰筆峰
先生列循吏傳鳳儀亳州學正子一貫舉鄉試亞魁
海豐知縣

陝西按察司副使邵公蕃墓志銘

李本

吾邑以德行文學表見於時躋穹齡而裕後昆者東
里邵公其一焉乙巳秋本視篆留院便道歸謁公公
尚能儼然周旋爲本道親故不倦不意別未幾而公
先逝矣豈惟我親故者之傷士類莫不嗟嘆云公諱
蕃字文盛世家吾姚東隅族屬蕃衍先多顯達人父
驩母韓氏公生而魁梧偉特有奇氣學步語時迥然
不羣三歲失怙知悲哀事繼母潘氏能竭力孝道六
七歲便日抱墳籍以爲學過目輒成誦是以學無所
不通尤深於禮經年十二爲舉子業通三場聲名藉

藉以起老師宿儒莫能以校得失年十五督學張公
試諸生首取公入邑庠生自是每試必居首無能易
者成化癸卯舉於鄉明年甲辰登進士第知建平縣
建平實而敝民甚凋瘵且訐訟滋漫緣以爲奸號難
理公至早作夜思務求安輯之道乃清以律已公以
御物有利罔不興有害罔不除衆瘼悉蠲羣情大洽
六年而政績顯著薦交上皆曰江南治行第一弘治
癸丑行取授山西道監察御史公益秉義奮忠

有澄清之志矣於是巡醴長蘆則肅憲度搜聲以并言
利歸於國商稱其便者莫加焉於是提學北畿則嚴
立規條崇文興行言公明兼至科第得人者莫如焉
戊午丁父憂辛酉起復補四川道是年又丁繼母憂
甲子起復補廣東道乙丑監會試所在踐職綜務廢
猷融茂丁卯陞陝西督學副使表正化導如在北畿
時查革民人冒名援例生員他邑補廩皆不避權貴
爲之逆瑾興平人絕與見銜之戊辰吏部推公擢四
川左叅政瑾從是疏中令致仕瑾被誅臺諫文章薦
公如巡按御史劉公天和都給事中張公瓚皆以公
抗奸去國志烈秋霜宜叙秩時楊公一清爲冢宰以
公代以督學時頗更其事謂形吾失也衆疏竟寢不

復起用士論惜之公蓬戶華門一疏食飲水數十年
終日危坐一室間讀書談道之外一毫不與焉知與
不知者莫不嚮往之郡伯玉泉張公敦請至郡爲鄉
飲大賓時年耄矣八邑之人多來觀者雖麟鳳之瑞
不是過也其仇之沮之者何在哉公孫漳嘉靖癸卯
以禮魁於鄉明年甲辰登進士第知六合縣政譽赫
然皆如公公得親見其後賢若此則天之報公者又
豈不多耶公生於景泰癸酉六月卒於嘉靖乙巳十
一月年九十三歲

陝西按察副使徐公聯墓志銘

顧璘

公徐氏名聯字成章長淮衛人其先本南豐人曾祖
梅始籍於衛父景春以功陞百戶進階武略將軍嫡
母李氏母高氏生公沉毅簡遠學詩補郡學生弘治
乙卯舉鄉試丙辰第進士言必法行必端不苟交接
爲衆嚴憚拜南京大理寺左評事明習法比獄多平
反嘗率同官劾罷刑曹舞智亂法者一時無敢高下
其手歷九載轉左寺副尋遷右寺正乙丑陞河南按
察僉事整理信陽兵備其地當四省交會多山谷盜
爲奸公靜鎮仁煦察見善惡不知難治以母喪去位

百姓遮泣郡縣致賻咸不受已已服闋復授前職得
巨盜盜賂鎮守太監廖堂求脫公執不變廖欲中以
他禍竟不得間而止陞陝西布政司右叅議時吏部
尚書張綵當權有欲爲營私第者假官政檄取帑積
公擲地不從陞按察副使理肅州兵備適有邊警乃
置家口於鞏昌單騎卽戎指授方略虜不敢近由是
謹斥堠厚糗備精簡閱軍聲大振乃禁諸將侵漁及
絕入貢哈密土魯番諸夷私覲內外帖服方經畫遠
圖辛未得瘖疾遂乞致仕清修苦節視平時加峻居
五年卒于家蓋正德乙亥九月九日也年五十有七
公爲人孝友忠信篤厚倫理喪嫡母毀瘠如喪武略
公時少受學從兄訓導公海終身師事維謹同母兄
繼以誑誤戍威遠公遇於逆旅畢力贖護攜其子女
赴官教育之及請老歸復遜故居與兄友愛益篤寡
嗜好仕宦垂二十年圖書之外無長物每去任凡有
司器什必按籍檢還信陽嘗有小罌貯藥出藥還之
爲文有典則晚益深造非御公牘手不釋卷所著有
畏齋稿若干卷藏于家

陝西按察司副使唐公希介墓志銘

徐縉

公諱希介字景賢世爲太原之陽曲人景泰甲戌正月十有六日公生而穎悟絕倫三歲知字五歲知書十歲知爲經義一時稱奇童云遊中丞貞菴陳公之門肆力探寃志在遠大不以程業拘也未冠補郡學生試輒高等庚子舉於鄉爲易魁丁未擢進士選授翰林庶吉士二年改工科給事中隨事建明直聲大振久之特被簡命稽省真定等四鎮儲備公躬親閱實盡得宿弊以聞於是權倖見嫉以他事中公謫四川石砭宣撫司經歷萬里遠竄怡然就道旣蒞任承

檄署仁壽雙流二邑公不鄙夷其民植善鋤惡俗用
丕變又檄視州茶政廉發私隱黠吏褫魄稍遷漢陰
縣令縣有鉅猾杜某作姦犯法持吏短長所居窟穴
湍阻捕吏莫敢蹤跡公密設方略擒而斃之繕完城
郭百廢具興再遷知揚之通州州臨海有漁蒲鹽泊
之利盜劫出沒司徼巡者歲入其賄陽翁陰縱民賈
交病公至揭賞購示以威信盜望風散逸境內獲安
河堤潰決撫巡檄公董治公內籌規畫外別勤惰旬
月之間嘉績亟成庚申擢陝西按察司僉事督餉榆
林邊吏有乾沒稽緩者公糾慝繩違軍餉不乏邊氓
有爭田久訟者公兩室其侵怨仇立解時大學士石
淙楊公總制邊務議增置茶市以贍軍賦公條答便
宜二十三事石淙公并施行之且貽書以謝其欽重
公如此未幾改四川僉事尋擢陝西按察司副使榆
林兵備仍兼督餉公愛養士卒約束裨校戎乘肅睦
邊威赫然軍府多贏積中官欲私取公執不可謹籍
以俟調發中官銜之構諸逆瑾瑾矯制逮公三木長
安市長子淇擊登聞鼓訴冤罰輸居庸米三百石復
其官瑾猶覬公往謝公堅執不往乃嗾御史劾公不
勝邊防重寄有詔著致仕公天性高剛每懸韋自警

然剛腸直氣數忤權奸禍且叵測而能屢折不撓完
潔去就可以觀其人矣惜乎宏才碩學未究厥施而
官簿偃蹇竟止於是不亦道消之邁然乎晚節公事
攜斂杜門掃軌娛意篇籍自奉儉素不隨俗華靡朝
夕程課諸孫親爲講解暇日則賦詩著文頗見已志
有石菴小稿藏於家非公會未嘗入州府雖姻黨戚
屬不輕造就清介之操老而彌劭優游桑梓越三十
年春秋八十有五諸孫繼起科第食天之報大耋令
終如公者可謂無憾矣

副使章公袞墓志銘

陳九川

君諱袞字汝明別號介菴君幼穎異不羣雖長治舉
業爲庠生然志以古賢豪自待早失怙恃家甚貧而
苦節危行恭其兄而友弟甚至常病俗儒不知經術
剽竊爲詞藻耳故博學精思期以致用旁究釋典了
其大意嘉靖改元以詩魁鄉薦明年舉進士出身選
試山東道監察御史久之實授累疏論時政劾長吏
卽卓然有直聲然君猶往往追悔以爲逐時沽名謀
國之忠未純也四年巡覈四川貴州軍餉事竣東還
得告八年卽其家起督南直隸學政君旣拜簡命益

自淬濯以立師道不作樹桃李念先德行而後文藝
進退多士一無所徇士習爲之一變於是聲聞日弘
十年廷議削夫子王祀君力諍之不可出爲福建建
寧府推官得謁練氏夫人墓四載遷松江府同知福
良威奸二郡人至今稱之十五年入爲南京職方員
外郎尋晉武庫郎中十七年改考功郎中司南京考
察有御史怙勢貪殘張甚首黜之遂倚時宰誣奏欲
中公以報怨而公論方偉君不可奪乃寢十九年冬
侍陝西之命君嘆曰吾老矣隨行折腰仰面以事人
望得禍不欲就其兄固強之乃行期蒞任後卽

從初志及秋會虜深入山西君當署潼關兵備憐
曰誼未可去也卽出繕城堡整甲兵日忘其勞爲
守備秋寇退而代者至乃以疾白兩臺以聞卽日攜
孥出關吏部移文留之不及宰執有銜君者因削爲
民二十四年恩詔始復冠帶當路交薦卒亦不用君
性澹泊又以親不逮養平居食不重味恒以儉素飭
其子居鄉嚴謹人不敢干以私至關國風民利未嘗
不剴言竭力生平不習家事而手不釋卷其爲詩文
恥鍊琢蹈襲自成一家所著有學庸口義隨筆瑣言
古文筆札若干卷

陝西按察司副使劉公從學行狀

公諱從學字時敏別號屏山生有異質方解語卽好誦書不與羣兒作俗戲成童隨先大父之金縣俸資且廉薄公竭力奉甘旨而自不厭粗糲暇則日誦千餘言先大父奇之始教之作文卽領大意後先大父謝政歸田適督學濯菴馮公會考公爲首遂登正德丁卯鄉薦試禮闈弗捷業大學己卯秋銓兵部司務公嚴以督責羣吏勤以註誦公文嘉靖甲申適廷臣議大禮各疏力爭公奏曰義隆正統情盡本生頒之詔令 聖心亦旣慰矣柰何欲去本生之稱非先王

虞後錄 卷之九十四
之禮啓後世之議豈不爲聖德累乎奏入留中公復
奏曰本生二字何違於禮何損於孝去此二字則援
立之恩繼統之義民而無存矣奏入復留中朝罷

上齋居文華殿金獻民徐文華倡言於衆曰昨諸疏
留中必欲改稱 孝宗爲皇伯考則大廟無考正統
有間矣何孟春曰 憲宗朝禮部尚書姚夔率百官
赴文華門跪哭爭論 慈懿皇太后葬禮 憲宗從

焉此國家故事公倡言於衆曰國家養士百五十年
仗節死義正在今日乃遮留諸朝臣於金水橋南曰
萬世瞻仰在此一舉今日有不力爭者當共擊之

赴左順門跪伏聲徹於內 上命司禮監官諭之曰

此禮 朝廷自有審處羣臣咸曰必得俞旨乃退及
午撼門大哭聲震闕廷 上大怒械繫而廷笞之丙

戌春陞戶部員外郎行查京庫及九門錢鈔時與內

官同事公守已清慎執法不撓吏部考績曰才識宏

深性質謹厚閱歷寢深聲稱愈著丁亥春陞郎中奉

勅總督遼東糧儲關防慎密餘銀分毫必記於官一

時官遼陽者如張公問行陸公杰麻公循咸服其老

成戊子冬奉旨九年考績赴部己丑春復補廣東司

郎中庚寅冬得給誥命辛卯乃奉恩旨焚黃祭墓壬

辰陞陝西布政司叅議分守隴西道及過先大父舊
治金邑父老擁留之隴爲邊郡地瘠民貧公澹薄自
甘束薪粒米不取於民州縣官不得以私謁伸冤理
枉付之公道俸入之外取一錢規矩之外行一事斷
乎不爲也臨鞏地方大虜壓境犯邊攻墩公督率官
軍勦斬獲首級奪獲達馬夷器奏聞 上嘉之賞銀
十兩紵絲一表裏時嘉靖戊戌也鞏昌府同知李暹
口稟站價銀五十兩送本道公用公叱之曰 朝廷
錢糧自當作正支銷卽時付府守冠子天與作正支
銷訖丁酉歲轉按察司副使奉勅整飭甘肅兵備抵

任豪橫斂跡邊境安堵不逾載有歸念移檄撫按公
遂浩然而歸官軍哭號遮道至不得行時閑住叅將
芮綱餽贖五十金公令千戶楊錦却之視四品之秩
不以爲貴二千石之祿不以爲富棄歸林泉飲水甘
於列鼎緼袍榮於華袞旣抵家山林寄傲不邇公門
終始完名無少玷缺嘉靖甲子仲秋偶感疾卒壽八
十有二云

陝西按察副使葛君覃墓志銘

語曰長算屈於短日嗟乎功必次而弘時才必久而
累績故人直多艱靡拒天損古志士深悲之吾磁葛
延之父操廉蹈勤約已奉國而官副使年五旬卒已
夫其抗志踐古展蘊立名期而勵者將若何而極也
磁又有御史王泮忠清乃延之伍亦早死悲夫吾鄴
生尤丁天損之虛邪延之諱覃祖玘父義母王氏嘗
封郎中及太宜人延之明朱詩正德甲戌舉進士令
樂清三遷官至南京戶部郎中守平陽乃憲陝西延
之有治才理簿書詰囚要精明立可辦吏不得爲奸

在樂清堪輿家言建署背吉地故令無遷官者宜改
治延之不從減武官濫役民遭其構不動在平陽辟
盧生又辯其屬之誣皆忤上官蓋其操廉無可指瑕
故遇事斤斤執典天性簡言笑交遊每日兢兢律身
恐越繩墨論者謂宜濟之弘裕然循其習性無變配
張氏亦封宜人五子逢春逢夏逢吉逢時逢辰一女
嫁張涵延之以嘉靖甲午九月二十三日卒生于成
化壬寅正月十四日逢夏為郡學生著名場屋間將
以乙未十月望葬其父余受託銘墓乃法先漢賢士
文體簡存要略且續鄴乘銘曰彼庫樸嫩乃材夏屋
胡短轅青大服四馬葛生履韞甫授伊廓而返冥冥
疇堅已約往恤人瘼而聞擘擘而石截截而詞揭揭
永登白潔

陝西按察司副使劉公效祖墓志銘

王一鶚

劉憲使名效祖字仲修別號念菴其先出山東濱州
始祖四當文廟時徙實都下占籍武讓左衛生八公
八公生能能生二子長通次達達以明經為御史大
夫通生寓即封君娶於彭生三子公其伯子也在襁
褓即喜弄圖書御史大夫課之膝下早善屬文年十
二彭見背袞毀如成人禮十六補博士弟子員嘉靖
庚子領順天鄉荐時年甫十九已而御史大夫歿家
中落公養封君志盡菽水歡又能周旋於二從父間
封君疾日夜侍湯藥籲天願代封君不起哭幾絕人

以孝稱庚戌登進士第出理衛輝故事司理以風聞
應直指其事之真屬輕重不問公察舉一二豪猾及
事之重且大者鞠報稱文無害嘗謂擊賣菜傭爲風
裁不爲也延津周氏某冤罹大辟竟白之其所平反
無算攝郡事釐奸剔蠹惟民便暇則進諸生談藝得
其教以進取者翩翩焉今東鹿尹趙君誥才而貧館
穀婚配皆爲之給祥符丞王某以病請骸骨爲具棺
斂以舟護歸其家磁州牧周某有墨聲恐洩夜懷金
遺之則遜謝去後復以私篋竄行李中旣露則密馳
以還以是中丞直指劾荐纍纍侍御浦公之誥更以

人望推轂之癸丑應內召乃柄臣有銜杜金吾者
公爲杜倩恐入臺省有左右袒陰阻之浦侍御力言
之始授戶部廣東司主事卽視九門未幾奉璽書易
粟梁趙間輦之督亢備雲谷緩急事將竣又勅督所
歷逋負則次第催科商民便之丙辰報最封父如其
官母贈安人已而督漕天津戊午陞廣西司員外郎
旋陞雲南司郎中職市金珠爲內供時 上用主豐
臺省建白主儉公籌盈濟虛權可剔否大司徒據之
以請如調劑然比歲烽火無警各營草日腐累商公
議散之諸營而見貯者給商以直人人誦便蘭州度

支蘇郎中以不預支倉儲被誣劾公爲雪之蘇得無恙以故大司徒楚中方公閩中馬公咸亟稱之清苑高公以諸司事盡委視草分宜父子每見其疏私重之欲羅之入幕乃婉爲謝遂陞陝西固原兵備副使行不入辭別不具饋固原於平涼罔寺地去步武罔卿某有內援日庇牧卒如私人卒每縱橫有問者輒撼以危言公不爲意徑執之置于法郭公宗臯謫戍原州請間一歸葬母諸大夫但佯應公大言曰戍者以失柄臣心吾儕可錮人以媚人乎況纍臣非埒大僂且也以親圖歸何失孝子心第歸我卽惟謹勿恤

中丞裴公行塞歷平涼朝王就席次以逋祿請裴公難之旣罷遂誣以舉爵壽王緩屬不敬欲上其罪公聞之乃曰嘉禮有注責在藩相所不預具焉用彼哉當先繫璫矧王以糧故於杯酒責望如國體何璫語塞旣而諸王孫遮道以挾則請姑面允去裴又否否諸王孫閔公責以危言身護裴以行王與諸王孫乃知朝廷紀綱森然如此一日虜忽闌入花馬池城下元戎提兵出無乘城者公先登鼓諸老稚備矢石虜覘有備竟解去城以完癸亥大計爲忘者所中當東歸原人扶老攜幼號泣車前者聲震四十里歸則闢

支蘇郎中以不預支倉儲被誣劾公爲雪之蘇得無恙以故大司徒楚中方公閩中馬公咸亟稱之清苑高公以諸司事盡委視草分宜父子每見其疏私重之欲羅之入幕乃婉爲謝遂陞陝西固原兵備副使行不入辭別不具饋固原於平涼罔寺地去步武罔卿某有內援日庇牧卒如私人卒每縱橫有問者輒憾以危言公不爲意徑執之置于法郭公宗臯謫戍原州請問一歸葬母諸大夫但佯應公大言曰戍者以失柄臣心吾儕可錮人以媚人乎況纍臣非埒大僂且也以親圖歸何失孝子心第歸我卽罹譴勿恤

中丞裴公行塞歷平涼朝王就席次以逋祿請裴公難之旣罷遂誣以舉爵壽王緩屬不敬欲上其罪公聞之乃曰嘉禮有注責在藩相所不預具焉用彼哉當先繫璫矧王以糧故於杯酒責望如國體何璫語塞旣而諸王孫遮道以挾則請姑面允去裴又否否諸王孫閔公責以危言身護裴以行王與諸王孫乃知朝廷紀綱森然如此一日虜忽闌入花馬池城下元戎提兵出無乘城者公先登鼓諸老稚備矢石虜覘有備竟解去城以完癸亥大計爲忘者所中當東歸原人扶老攜幼號泣車前者聲震四十里歸則闢

日涉園日日陶情觴咏間少醺作樂府數闕擊節歌
之乃肆力修詞大業與海內詞客或結社或飛筒授
東爲詞林盛會諸大夫或就而問政多所指畫語不
及私會王大成變有欲以奇禍中素隙者事屬白金
吾白詣決策則握手示曰族人狗人毋論非丈夫所
爲如冥冥何第訊罪人自得其情白如其言大成伏
辜幾中考得無恙京兆大梁曹公念京畿首善地關
專誌欲徵載筆督府北海劉公以薊門邊乘先聘之
因而如檀州作關鎮志凡三閱歲以是得縱遊諸塞
上所至輒有紀公一日聞主上問其姓名因賦詩

志感曰更生雙鬢已蕭騷敢謂文章擅彩毫過誤偶
承明主問因緣不是鬱輪袍萬曆己丑二月卒距
生嘉靖壬午七月年六十有八著述有四鎮三關志
十二卷春秋窻稿二卷劉仲修先生詩集若干卷文
若干卷塞上言一卷盛世宣威清時行樂二卷燈市
謠長門詞二卷雲林和稿空中語短柱效顰閑中一
笑裁冰剪雪都邑繁華蓮步新聲共七卷行於世

陝西副使黃公卷傳

耿定向

黃憲副公卷初官比部出補山西僉憲晉陝西少參
已晉憲副卽解綬歸年才四十有五耳公歸蓋卽
真明農云春夏間家衆悉驅之田作而獨與其配操
杵曰炊釜作飲食躬荷而饁之嘗假農具鄰舍鄰舍
子欲舁送之公曰母此何時也假我具卽德厚矣柰
何又妨汝務遂自肩之如田焉公性故孤介悃樸而
逸興甚豪雅嬰情山水間山嶠水澗靡不遊至或乘
敝輿或策款段或曳杖躡躡脩然咏嘯飄飄若仙焉
家去城邑四十里而近經歲不一至至則市童撫掌

歡呼相指曰黃公來也蓋識其輿敝陋云公居常好
客客至座已徐起臨庖服犢鼻衣治具具無兼味治
畢乃盥手更衣出卽新媼上客率以爲常余一日偕
周元孚進士候公公歡甚縱談名理因及疆場事奮
然有請纓之志移日不輟已有婢從屏間稟曰烹雞
熟矣請割公曰少需蓋劇談方適無間也有頃婢稟
如初公又曰少需如是者三而公談益劇乃命婢曰
汝姑自割旣共饌出哉肋狼籍不爲意也公間起入
室余從之闕其室一榻蕭然不啻僧舍也余時若冷
然噓以清風洒然沃以瓊漿也退謂元孚曰吾與子
今幸游羲皇世矣相與嗟嘆不置云耿子曰夫世約
其躬爲言節行者類多齷齪迂滯不能事事彼蓋知
飾爲名高者也其真漓其性牯矣公率性之真從心
之安孟子所謂人有不爲可與有爲者非乎藉令世
誠重用之請纓之志計能償之不虛也余又嘗聞里
中前輩若鄒劉周李董阮諸公其風軌大都如是顧
所及覩記者惟公因憶父老相傳宣正成弘間里中
民物殷盛閭巷熙熙有以也乃今里中身有完服面
無菜色父子兄弟相聚而無愁嘆聲者蓋鮮曷故哉
吏治之日媮也吏治之日媮則士節之不立也士節

之不立則古道之寢微而紛華之爲蒞甚也卽吾一
鄉而天下可類知已嗟嗟孰謂公履爲細謹哉公蓋
古道之碩果矣余茲重有慨焉爰拾公一二淺事爲
外傳云

陝西按察副使梁公承學墓志銘

于慎行

梁公諱承學字師顏東郡名家也其上世居冀洪武
中有士成者占籍爲聊城人士成生無爲知州棟棟
二子智能智生舉人璉能生南京戶部主事璽璽生
新城知縣相是爲公父其後以公貴再贈奉直大夫
戶部員外郎初配李氏生承祖繼配王氏生公其後
皆贈宜人公生有殊質六歲而孤家又貧獨從母宜
人居攻苦誦習髫年學成楊襄毅公校士東郡才之
嘉靖己酉方十有八歲以易舉山東省試聲動齊魯
間其後數上春官數罷益發憤不少沮竟以隆慶戊

辰成進士有同姓中官方貴用事請與序族公正色
曰吾誠不知系所從出顧安得妄附人以邀寵澤謝
弗與通座主少保殷公聞而重之除陝西延安府推
官公雅精法家指然其讞獄以平恕得情不欲核刻
搏擊取小治辨爲名一日閱獄中囚有八歲小兒投
石戲誤中七歲兒斃吏增兒年論死公廉其狀立貫
之府中卒出顧金錢照磨笞卒卒後病死吏當故勘
平人律公曰卒爲奸利非平人照磨笞之固當柰何
中法亦減死論他所平反如此類尤衆至品第郡邑
吏賢不肖狀無不精當而大指取寬厚不求人細過

居秦中滿考奏荐十有三疏計且召入而柄銓大臣
故嘗撫陝有所嘆於公乃擢爲南京工部主事時論
屈之在南曹時嘗疏瓜儀河道理沿江蘆課咸有能
名後以修孝陵工加俸一級滿考奏績改戶部廣西
司九江權稅序當遣公郎中有所善欲往以公改北
爲新任不當遣同曹咸爲不平公曰使職等耳何必
九江竟無一語已而所遣者以墨敗人益服公嘗司
庾天津出納平慎進山西司員外郎再進浙江司郎
中改雲南司雲南司者專主漕政於子部爲劇司徒
擇而得公公握籌推會區畫劑量悉中肯綮督倉尚

書欲扣漕舟盤剝之費奏爲羨餘運卒聞而大譟尚
書恐夜召公公具陳不可狀爲草疏平亭之奏下運
卒乃安言者疏倉曹郎使竣令御史核殿最下戶部
議諸郎愕莫能對公奮言曰郎御史各以職奉使相
頡頏郎卽不稱使大司徒在是何與御史竟寢其議
先是議者以江北田荒奏遣憲臣一人督吏民開墾
三年命公往視狀公馳至其地徧覆穀土荒墾民人
流亡具得其實以報甚稱上旨然亦陰取忌矣故事
郎秩八年以往當陞叅政公平生澹於進趨無所內
交主爵以爲才任治邊擢陝西按察司副使備兵鄜
延公夷然不爲意再至塞上日夜按行所部繕治城
堡修飭武備西邊大治嘗以丈田奏荐詔主爵志其
名又嘗以閩邊勞受金幣賜聲稱大振宜君徇賊嘯
聚撫臣欲發兵捕公謂此皆凶歲饑寒救死不足以
辱軍吏不見嶺南蠻夷事耶遣郡邑丞尉持檄往諭
之賊感泣立解散撫臣意沮會其年關中大侵至人
相食公設法振貸多所全活而爲忌者所構反以爲
救荒無狀有詔改用公因拂衣東歸遲回不欲出久
之故人多趣公北上乃裝詣闕行至武城而病亟返
舟抵舍數日卒萬曆丙戌二月距生嘉靖壬辰三月

得年五十五歲公爲人濶達有度重厚簡朴不爲小
文天性孝友內行甚修事兄及寡姊恩禮備至於族
人親戚多所贍給交遊無間窮達緩急賴之有長者
稱于生曰江北故鮮大族如梁公五世科第爲吏可
指數耳然吾聞其家蕭然如諸生大父以來田廬無
所益稱清白吏子孫矣治獄多平反以尺檄解散劇
盜仁人之利博焉綏輯譁卒出於頃刻若正言御史
郎吏之職忼慨引義懦夫動色斯已壯矣予觀公諸
子皆賢雋有文昌大其家不可涯涘用其所不足於
後儻天道耶

陝西按察司副使沈先生啓原行狀

澹園集

嘉靖甲子比士

上用言官議兩畿分校選京秩有

學行者充之於是霓川沈先生以南屯部郎校尚書
得十有三人不佞某亦幸與焉異日宜猶著績爲時
名流者項背相望人以是多先生之鑒獨不佞脉脉
靡所樹先生開發成就之始終備至蓋二十有五年
如一日也昨某濫竽一第先生色喜貽書鐫勉卽某
淺薄不能副期待之百一庶藉模楷以自免於訾戾
而先生逝矣嗚呼痛可言哉先生弟啓南將相兩孫
葬先生嘉善思賢里祖塋之次以母系生卒行事屬

小子布狀將圖所以紀諸幽者小子則曷敢辭先生
諱啓原字道初別號霓川其先汴人宋南渡遷會稽
洪武中始祖庭芝自會稽徙松江遷善鄉宣德中以
遷善鄉隸嘉善遂爲嘉善縣人庭芝生瑾字子厚始
贅居秀水之長溪子厚生璠璠生淵淵生度世以孝
弟力田起家度生東園公復是爲先生大父用子貴
封徵事郎刑科給事中東園公生石雲公謚卽先生
考舉嘉靖己丑進士由行人授給事中仕終湖廣參
議石雲公配盛氏贈孺人繼盛氏封孺人是爲先生
母後並以先生南曹卽考績石雲公加贈朝議大夫

繼配盛孺人亦晉封恭人初石雲公數艱子久之如
舉先生先生生而奇偉當庚寅年五歲會石雲公奉
使代藩事竣還京留先生侍東園公于家臥起唯諾
有成人度東園公甚喜之及石雲公轉山東僉憲歸
則先生年十二學日就緒自是更延高等博士弟子
教之如一山王公文湖盛公皆先後受業歲庚子督
學蒙溪張公校士得先生大爲稱賞以儒士應試省
闈歸而補邑諸生益折節好學復集郡中時髦爲會
于水東別業及文湖書院乃丙午舉于鄉年財二十
有一也丁未庚戌癸丑三下第歸五七年門佐石雲

公治大母喪及公家遊江右所爲攝理家政井井矣
暇日則經史諸家大肆觀覽至于麟經則有集解馬
班則有集覽卽堪輿醫卜諸書靡不尋其宗趣父子
家人自相師友所考究必詳且至蓋先生性敏志篤
功夫深密宜其博而有要也癸丑石雲公自江右歸
卒于家甲寅東園公亦逝先生喪葬事事致於豐會
倭亂暴起以軍興加賦閭里騷然督撫公破禽於海
等于平湖奏捷還郡城文武將吏暨召募土著之兵
皆在餼廩行糧日費二百金不貲縣令念閭里空乏
盡括羨餘以佐之不五日告竭先生偶以他事謂令
與語令忽忽仰屋深念先生曰公何念之深也令曰
非他時文武大臣及募調諸兵在念有能具五日費
則某之責可逭已先生立曰原當任之令躍起拜先
生亦拜卽夜歸率幹僕數人持千金畀之聞者以爲
難初徐海未禽連歲剽掠嘉湖蘇松間先生倚膂力
販徒散以飛舸日團聚長湖大溪中躬指授進退之
法重償其直而諸販徒亦自感奮一日倭果操兩巨
艦由平望入鄉而南近家不一里遇飛舸從傍夾擊
之因迤邐北逃至晚先生大犒之顧鄉之親友曰吾
以此舟得免一鄉害較所費孰多此舉也始以團聚

而脫倭奴之禍又以脫禍而收販徒之心知者自是服先生才可以大受也已未成進士廷對策文詞古雅楷法工緻咸謂上第不忝及發卷閣部大臣果遣報一甲第三人矣會以他故移置二甲十七名故事十七名者爲選首於法得北曹郎以前一人欲爲選首過先生曰使若以序次必首選予得州守矣幸若安之母難予先生曰選之先後例也予豈有所謂哉予固不敢以君之過而爭亦不敢以君之過而讓當聽其自至及期前一人果挾分宜執下銓部時冢宰遂駕言以親知故爲先生嫌而欲首前一人選司王力言下冢宰曰因親知而印之不可因親知而抑之亦不可執不肯首前一人卒並授南曹而先生爲屯部郎先生怡然曰南北等耳況予性簡澹南曹甚宜我庚申蒞任值分司儀真者爲臺中劾去大司空康公曰是役也非沈郎不可先生抵真州大反前政於開時其啓閉於舟疏其往來於樁輕其陪罰於商任其通販於賈免其徵繇而浙直白船例不得由閘先生具呈大司空弛其禁瓜儀里老甲戶至肖形尸祝之蓋所攝僅四旬耳會新任者代遂歸董蘆政盧政差奉旨有勅印其體視臺中乃前是者自爲貶損故

奉行者後而豪民占洲場負稅課不可勝計金錢累
鉅萬積逋至三十年先生一拜命立詣所轄申明職
掌而又上請大司空曰柰何上下欺蔽第以國家利
爲奸豪橐資也宜具奏移文撫按嚴督各屬于是人
人知先生意旨遵守益謹追徵補解月不下數千計
前未有如先生之多而體貌亦未有如先生之重者
癸亥轉本司郎中尋考績得贈考妣如制而其配錢
亦封安人乙丑調南儀制司金陵多佳山水碁置綺
錯而禮曹又清暇先生率二三同志于燕磯棲霞間
攜壺賦詩婆娑甚適人見以爲悠然送日而先生之

韻度遠矣丙寅冬遷四川叅議明年丁卯奉盛恭人
行抵蜀所轄爲川南道時天全土官高定楊時譽相
讐殺當事者莫知爲計先生至移檄諭之其中宣揚
朝廷之威德追述先代之功勞鼓舞世傳之忠順究
竟起釁之緒端諄諄數千言示以禍福利害令其改
圖二家感悟謂先生不卽奏勦而拳拳諭解使我輩
如前搏噬能免禽滅哉於是鈐束部夷解散黨與一
聽先生約束而邊民臥始帖席矣他如申鄉約嚴保
甲慎巡警禁私渡行之內地者人咸稱便而豁鹽井
續增之課銀定番僧賞犒之限制尤爲無窮利云皆

所陳公寅所嚴公撫蜀兩列薦剡謂大用可指日埃也歲已巳以盛恭人卒于雅州官舍扶櫬歸某弔之江許先生涕泣交頤令余不忍舉首眎以別癸酉服闋適子邠領鄉薦北上先生偕之甲戌補山東叅議其分道在濟南而省政之當議者有稅糧牧馬二事先生甫至議稅糧徵解自有成規而郡縣所行不一有照舊總收僉大戶分解者有分倉徵收經收人領解者有各里自收大戶類解者有總立櫃頭各戶自投納者非畫一規擬總收之銀差佐貳首領類解郡中卽以羨餘充道里費其解銀大戶盡裁之止米麥仍僉大戶收解而催督責之里排監收屬之大戶櫃設之公堂種種悉爲經畫議上撫臺著爲令而吏書之弊竇塞小民之陪累減一省皆受惠矣牧馬之役濟兗東三府獨當之而青登萊無與先生閱其不均酌令彼此通融以疏民困議上馬院亦爲令丙子秋遷陝西按察副使治關南當四通之達驛傳爲累錢糧不支會撫臺董公下先生議先生歷考道路之衝僻供應之繁簡至馬驢夫役一一斟酌至今遵其例行之丁丑子邠成進士上又試進士之杰者令讀中秘書邠得首擢先生聞報嘆曰夫子家世耕讀

有何修爲而受國恩乃三世哉吾其歸矣適撫臺委
勘城垣弗果行先生詣各州縣躬閱略陽鳳縣褒城
因其地形量爲修築三城悉爲巖邑先生力也十月
按院巡金州守道缺先生并署篆遂赴金州不五日
撫臺亦於是時巡鳳縣金州去鳳縣爲里二千而遙
度不能兩詣乃以揭迎之撫臺謂爲慢已因以他語
中先生奏旣上先生翩然登舟無幾微見顏面歸塗
泛洞庭登太和每於山川名勝輒低回留不能去曰
吾少不能爲少文之遊幸所歷多名山足償吾願歸
而自號岷峨泰華主人識西蜀東山陝右也北抵家
奉旨調用當事以先生清望久著輒議補先生先生
徐念曰夫人生之樂在曠然全其天真吾自登第抑
首者二十年茲得寬假又何能以七尺軀僕僕爲人
頰印耶且機穽已蹈尚不覺悟將令溪上之鷗笑人
也遂絕口不談世事亦不復通謁貴顯惟日相羊長
溪之上芟葺先人林園誅茅治屋爲偃息計爲堂有
與閒存石爲閣有柴芝闥風爲齋有止觀徐于爲臺
有紫雲香雪爲亭有蒼玉點易栽花種竹野服葛巾
親朋來往如山人而已性澹朴無所芬華飲食之奉
雖精潔未嘗過豐見富室窮水陸之珍必曰古人飲

不過三爵食不過五鼎陶然驩洽矣何乃暴殄至此哉被服鮮整然非紉濯數四不更至于繕築棟梁榱題至竹頭木屑經紀毛密斧斤無剩材布算無遺策卽匠石氏心計不如也或有以逐十一之說進者則閉目搖手曰與其悖入而濫費孰若節費而寡營辭受取予無大小壹禀于義有請托輒遜謝之脫冤抑不白毅然爲之申理雖動遭物議不惜也聞人善極力播揚不善必隱之有以實叩者則日經目之事猶有未真况捉影捕風者吾敢信乎與人交無所不容始或以他事見欺旣而敗露先生知之如弗聞也者

弟啓南少而孤先生愛之甚置臥內與同課誦至漏下三四鼓不勦族多窘先是東園公置義田若干爲昏喪資先生復以其餘歲莫人給之每歲租入率蠲十之二三貧交疎昆弟人人得所欲以去故當被疾日無貴賤大小爭趨祈禱願以身代所在祠廟肩摩踵接至屬纊後弔者無不泣且悲焉平生珍玩貨珎聲色狗馬略不屑意而所篤好惟圖藉上自金匱石室之藏以至今古集悉購無遺或少缺略借之儲書家務繕寫完好乃已舊有萬書樓三楹爲石雲公藏書處至是所積滋多復爲樓貯之名曰芳潤淨几明

窻悠然翻閱手不停披寢食俱廢雖樂收藏不拘拘
宋元舊刻惟求紙版精明足供披覽人有惠先生書
者啓封忻然卽百朋不啻也平居不耐酬應或談經
史評法書而闍人持刺以進蓋未啓緘眉爲之攢矣
卽當路諸公多門生故吏先生絕跡不入城不投謁
然當路推轂人才必引以爲重先生顧視之泊如也
所爲詩冲澹夷曠氣韻和平一字不受中夜推敲務
求是當文則疏鬯縝密詞足發意所謂仁義之人其
言藹如也蓋庶幾近之所著有詩文二集公移雜著
藏於家先生爲人儉約自飭而賑窮周乏雖多無所
吝接人温温而義有不當輒毅然不可回奪平居呐
呐似不能言而上下古今評騭經史如倒囊出物愈
出而愈不可竭獨其用未盡酬於世而其文章議論
又未施於郊廟朝廷第爲士民間里所歌誦其所歌
誦者不過以爲有惠政與篤行爲君子長者之遺風
而已未能信其可大用者爲何如也嗟乎使先生調
官時迴翔不去居家不堅臥不起必能致通顯有當
世事功然先生去之決不起之堅皆有深意其出處
去就靡不當於義而斷之以勇豈苟然哉凡材敏者
類能馳騁乎事功而非負學術者其出處去就未必

當於義先生得其難而易者可知已小子於諸門人荷知特深握手深語進以爲可教顧於先生之歿未能奔哭以少效執紼之役惟是講聞事行最深且久敢謀諸先生之弟撥拾大略次序如右以自附於門人小子之誼俟銘先生之墓者擇焉先生生嘉靖丙戌正月十有二日卒萬曆辛卯三月二十有四日享年六十有六配恭人錢氏子一自邠丁丑進士翰林院修撰先先生二年卒

陝西按察司副使梁策傳

陝西按察司副使梁策河間鄆陵人性至孝七歲母病將不起旦夕焚香泣中庭請以身代持香謁城隍廟伏地涕泣幾絕一黃冠授藥一莖僅寸許曰煎湯服之服卽旋已亦不知爲何藥人謂孝感致然時稱孝童就外傳手孝經不釋嘗曰政本在此居官者當置一卷於座右何國家設科不用此也慕黃香之爲人習溫被扇枕稍長法曾子奉親百凡先意承順常若不足十七齒鄉校二十四籍鄉書孝聲藉甚行部使者往往移檄書物色抗辭逃避三十四中嘉靖乙

丑進士居都下心脉脉不肯拜官封郎中切戒始授
工部營繕司主事歷員外郎中居郎署十年三請告
省親留封宜人侍養未嘗以隨陞四川成都知府嘆
曰我必不能化馭如王陽矣抵家蒲伏封郎中前號
泣以請封郎中大怒曰盡力王事非孝乎爾好孝經
不憶始於事親終於事君耶猶伏地不起舉杖欲擊
方起而戒途抵成都數月而大計計畢疏請終養時
封郎中封宜人年皆七十躬調甘脆未嘗任侍兒一
茶一湯必跪進徹則必請封郎中老益好遊日遊於
所知之家寒暑不廢每至漏下數十刻秉燭坐待闌
人報至趨門迎掖入寢室候寢定而退質明盥沐至
寢門問侍婢安否安則喜稍不安節憂惶廢食衣不
解帶人言修虔太和山可致親壽徒步往十步一下
拜千有餘里不知勞二人壽並八十封宜人歿哀毀
如禮既葬日廬墓側暮歸侍封郎中封郎中病脾不
能離衽席調飲食跪榻下手舉匕筯以進踰厠衣躬
視澣濯如此者年餘時季子歿配封宜人無祿皆不
問封郎中歿既合葬廬墓側日以筐承土首戴加墓
有慈烏數百集廬下筐舉卽飛而前導馴擾依人服
闋不能去墓所縉紳先生曰如禮制何再拜泣而徹

盧嘗夢一緋衣幘頭人呼曰梁孝子我厚漢肇恕葬我葬我詰旦園丁劬地得石果肇恕墓爲文祭而葬之初成進士部送遼左軍餉故事餉無如額者此餉獨如額遼軍懽聲動地主帥盛筵再拜曰近世所僅有也營膳部董大工往年錢穀盡中官處分闌出無算乃一切禁革大忤中官日圖中傷之陰伺無所得改度支郎督維揚餉裁革一切冗費揚人感嘆不容口晉郎中大工成敘功當陞尙寶以中官中之陞知府親終當補官有司具徒御不行直指黃縣林豫章周中丞新都吳文章列孝行以聞詔補山東登州府時倭夷蹂朝鮮登州戒嚴南兵三千戍守白督府曰是卒羈旅也瀕海多健兒與衣廩而日練之皆精兵矣彼利得衣廩保室家豈不勝召募督府稱善數月得兵數千值大水歲稔請徙南兵就食有收處餉遼米數萬斛貯海上散饑人使者俞允徵是謀則餉米盡浥爛餒人填溝壑無算也一胥爲妖所憑聞而怒曰何物妖敢爾檄城隍治之胥夢妖曰梁孝子驅我我去矣翊日無恙居無何陞陝西按察司副使力疏投閑居喪絕不茹葷中外歷官十餘年俸外毫無染指交際應酬一切取足於家自壯至老急於周人父

黨母黨妻黨隣里隆殺有等歲以爲常婚喪不舉莫
不加意衣赭衣呼庚癸昏暮叩門無不應應必滿其
欲而去遠方宦學尤所加意送往迎來無虛日人有
片長嘉樂稱羨其拂意者未嘗形色辭孝廉仁厚悉
悉根諸天性非由勉強鄉人慕德孝不能忘醵錢立

孝子祠

